

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 28.11.2024

प्रमुख समाचार –

- उपमुख्यमंत्री अउ गृह मंत्री विजय शर्मा ह कहिन कि आत्मसमर्पित माओवादी अउ माओवाद पीड़ित परिवार मन ल पुनर्वास नीति के तहत घर दे जाही।
- केन्द्र सरकार ह “प्रसाद योजना” के तहत राजनांदगांव जिला के मां बम्लेश्वरी देवी मंदिर म तीर्थ सुविधा विकास परियोजना बर अड़तालीस करोड़ चवालीस लाख रुपिया के दीन मंजूरी।
- आज छत्तीसगढ़ी राजभाषा दिवस हे—मुख्यमंत्री विष्णुदेव साय ह प्रदेशवासी मन ल बधई अउ सुभकामना दीन।

माओवादी पीड़ित—आवास

उपमुख्यमंत्री अउ गृह मंत्री विजय शर्मा ह कहिन कि आत्मसमर्पित माओवादी अउ माओवाद पीड़ित परिवार मन ल पुनर्वास नीति के तहत घर दे जाही। ओमन ह बतईन कि राज्य सरकार के कोसिस ले केन्द्र सरकार ह प्रदेश म प्रधानमंत्री ग्रामीण आवास योजना के तहत पन्द्रह हजार घर के स्वीकृति देहे। श्री शर्मा ह किहीन कि पीड़ित परिवार मन ल घर मिल जाय ले माओवाद प्रभावित क्षेत्र म रहइया परिवार मन ल सुरक्षित अउ सम्मानजनक जीवन मिलही। ए विशेष परियोजना के तहत पुलिस अधीक्षक, जिला पंचायत के मुख्य कार्यपालन अधिकारी ल आत्मसमर्पित माओवादी अउ माओवाद पीड़ित परिवार के सूची दे जाही। एखर बाद जिला पंचायत डहार ले ए सूची के सर्वेक्षण अउ सत्यापन करे जाही। सत्यापन के बाद कलेक्टर के जरिया ले लाभार्थी मन बर भूईया के चिन्हारी करे जाही। एखर आधार म प्रधानमंत्री आवास योजना के दिसा—निरदेस के मुताबिक घर बनाय के काम सुरु करे जाही। ए योजना म बिसेस रूप ले ओ परिवार मन ल सामिल करे जाही, जेखर नाव सामाजिक—आर्थिक जाति जनगणना दू हजार ग्यारह अउ आवास—प्लस दू हजार अट्ठारह के सूची म सामिल नइ हे। ए नाम ल छह दिसंबर तक आवास प्लस पोर्टल म डाले के अनुमति केन्द्र सरकार डहार ले दे गेहे।

राज्यपाल—कबीरधाम

राज्यपाल रमेन डेका ह आज कबीरधाम जिला के प्रवास के दउरान अधिकारी मनके बइठका लेके सासन के योजना के क्रियान्वयन के समीक्षा करीन। ए दउरान ओमन ह समाज के आखिरी मनखे तक योजना के लाभ पहुंच के जरूरत उपर बल दीन। ओमन ह अधिकारी मन ले नशामुक्ति अभियान, भिक्षावृत्ति उन्मूलन अउ विशेष पिछड़ा बैगा जनजाति के जीवन स्तर म सुधार बर कड़ा कदम उठाय के निरदेस दीन। राज्यपाल ह जिला म रहइवया विशेष पिछड़ा जनजाति बैगा आदिवासी मनके शैक्षणिक, आर्थिक अउ सामाजिक विकास के संग ओमन ल रोजगार के अवसर दे बर कहिन। ओमन ह युवा मन बर कौशल विकास योजना ल प्रभावी ढंग ले लागू करे के निरदेस घलो दीन। राज्यपाल ह टीबी अउ सिकल सेल जइसन गंभीर बीमारी के उन्मूलन बर समन्वित प्रयास के जरूरत उपर जोर दीन। अपन कबीरधाम प्रवास के दउरान राज्यपाल ह प्रधानमंत्री जन—मन योजना के हितग्राही बुधे लाल बैगा ले मिलीन अउ ओमन ल नरियर देके सम्मानित करीन। उहें, प्रधानमंत्री आवास योजना—सहरी के तहत बने घर के निरीक्षण करीन अउ हितग्राही कुमारी श्रीवास ले बातचीत करीन अउ उंखर सम्मान करीन।

मुख्यमंत्री-संगोष्ठी

मुख्यमंत्री विष्णुदेव साय आज रायपुर म “जनजातीय अस्मिता, अस्तित्व अउ विकास” विषय म होय संगोष्ठी म सामिल होइन। ए कार्यक्रम म मुख्यमंत्री ह जनजातीय समाज के परंपरा, संस्कृति, रीति-रिवाज, तीज-तिहार अउ सासन डहार ले जनजातीय उत्थान बर चलाय जात योजना के जानकारी साझा करीन। ए दउरान ओमन कहिन कि जनजातीय समुदाय के विकास बर “पीएम जन-मन योजना” अउ “धरती आबा जनजातीय ग्राम उत्कर्ष अभियान” जइसन योजना चलाय जात हे। श्री साय ह तेरह नवंबर के जशपुर जिला म होय पदयात्रा के सफलता बर प्रधानमंत्री नरेन्द्र मोदी के प्रसंसा करीन।

केन्द्र-साइबर क्राईम कार्रवाई

देस म बाढ़त ऑनलाइन धोखाधड़ी के मामला ल देखत केन्द्र सरकार ह साइबर क्राइम अउ डिजिटल अरेस्ट जइसन धोखाधड़ी ल रोके बर कार्रवाई करीन। केन्द्रीय गृह मंत्रालय ह ए बेरा म सत्रह हजार ले जादा वाट्सऐप अकाउंट ल ब्लॉक कर देहे, जेन साइबर आपराध अउ धोखाधड़ी बर प्रयोग करे जात रिहीस। ए अकाउंट्स मुख्य रूप ले कंबोडिया, म्यांमार, लाओस अउ थाईलैंड जइसे देस ले जुड़े रिहीन, जेन भारत म लोगन मन ल ठगे बर सक्रिय रिहीस। ए कार्रवाई ल ऑनलाइन धोखाधड़ी ल रोके के दिसा म एक जरूरी कदम माने जात हे। जानबा के मुताबिक ए बछर जनवरी ले अक्टूबर महीना तक देस म डिजिटल अरेस्ट ले संबंधित बयानवे हजार ले जादा मामला आगू हे।

प्रसाद योजना-राशि

केन्द्र सरकार ह “प्रसाद योजना” के तहत राजनांदगांव जिला के मां बम्लेश्वरी देवी मंदिर म तीर्थ सुविधा विकास परियोजना बर अड़तालीस करोड़ चवालीस लाख रुपिया के मंजूरी दीन। केन्द्रीय पर्यटन मंत्री गजेन्द्र सिंह शेखावत ह आज राज्यसभा म ए बात के जानकारी दीन। ओमन बतईन कि छत्तीसगढ़ बर “स्वदेश दर्शन योजना” म अवइया पर्यटन मंत्रालय ह लगभग पांच हजार दू सौ नब्बे करोड़ रुपिया के छिहत्तर परियोजना ल मंजूरी दीन।

छत्तीसगढ़ी राजभाषा दिवस

आज छत्तीसगढ़ी राजभाषा दिवस हे। ए बेरा म मुख्यमंत्री विष्णुदेव साय ह प्रदेशवासी मन ल बधई अउ सुभकामना दीन। ओमन ह कहिन कि “छत्तीसगढ़ी भाखा म हमर माटी के महक आथे। छत्तीसगढ़ी भाखा हमर अभिमान हे। सब अपन भाखा ल मान देहू तभे ओ आगू बाढ़ही।” श्री साय ह कहिन कि छत्तीसगढ़ी भाखा के बिकास बर छत्तीसगढ़ी ल दैनिक बोलचाल के संग साहित्य ल गढ़े अउ प्रचार-प्रसार के भाखा बनाय के जरूरत हे। हमन ल अपन परंपरा, संस्कार ल बढ़ावा देके संग उंखर परिचय नवा पीढ़ी ले कराना घलो जरूरी हे।

राज्यपाल-संविधान संगोष्ठी

राज्यपाल रमेन डेका संविधान दिवस के बेरा म रायपुर म होय संगोष्ठी म सामिल होइन। संगोष्ठी ल संबोधित करत राज्यपाल ह कहिन कि संविधान ल केवल पढ़े नइ, संगेसंग एला समझे अउ पालन घलो करयं। ओमन ह संविधान के आने-आने धारा के तहत उल्लेखित नियम के जिक्र करत किहीन कि पाछु पचहत्तर बछर म संविधान म कतकोन संशोधन करे गीस, जेन देस के बदलत जरूरत के अनुसार जरूरी रिहीस। एखर बावजूद संविधान के मूलभावना, समानता, स्वतंत्रता अउ न्याय नइ बदलीस। ओमन ह किहीन कि जादा ले जादा माईलोगिन मन ल राजनीति म भागीदारी करना चाही। माईलोगिन मन म नेतृत्व क्षमता होना जरूरी हे, जेखर ले माईलोगिन मन सशक्त होही। संगोष्ठी ल उपमुख्यमंत्री अरुण साव ह घलो संबोधित करीन।

कार्यशाला

नवा रायपुर म आज “सतत आवास और कृषि क्षेत्रों में छत्तीसगढ़ राज्य जलवायु परिवर्तन कार्ययोजना के क्रियान्वयन” म कार्यशाला आयोजित करे गीस। ए कार्यशाला म पद्मश्री उमा शंकर पांडे ह जल संरक्षण के अपन अनुभव साझा करीन। आकाशवाणी समाचार ले बातचीत म श्री पांडेय ह कहिन कि छत्तीसगढ़ म जल संरक्षण बर विश्वविद्यालय अउ संग्रहालय स्थापित करे जाना चाही। जानबा के मुताबिक उत्तरप्रदेश के बांदा निवासी पद्मश्री उमा शंकर पांडे ह बिना कोनों सरकारी मदद के “खेत पर मेड़ और मेड़ पर पेड़” अभियान के

जरिया ले अपन गांव म जल संरक्षण के दिसा म अच्छा काम करे हे। ए कार्यशाला म जलवायु परिवर्तन अउ कृषि ले जुड़े बिसेसज्ञ घलो सामिल होइन।

रिक्त पद—भर्ती स्वीकृति

वित्त विभाग ह नवा रायपुर अटल नगर विकास प्राधिकरण म छियानवे पद, विद्युत निरीक्षक कार्यालय म सत्ताईस अउ न्यायालयिक विज्ञान प्रयोगशाला—एफएसएल म वैज्ञानिक अधिकारी के अट्ठाईस खाली पद बर भर्ती के स्वीकृति दे गीस। अइसने, तीन विभाग म कुल एक सौ इंक्यावन आने—आने पद बर भर्ती होही। राज्य म अब तक उन्नीस विभाग म आठ हजार नौ सौ इकहत्तर पद म भर्ती बर वित्त विभाग ह मंजूरी देहे।

सुनील सोनी—विधायक शपथ

रायपुर नगर दक्षिण विधानसभा क्षेत्र के नव—निर्वाचित विधायक सुनील सोनी ह आज विधायक पद के सपथ लीन। विधानसभा अध्यक्ष डॉक्टर रमन सिंह ह छत्तीसगढ़ विधानसभा परिसर म होय समारोह म श्री सोनी ल विधायक पद के सपथ दिलईन। ए बेरा म मुख्यमंत्री विष्णुदेव साय के संग राज्य मंत्रिमंडल के सदस्य अउ विधायक मौजूद रिहीन।

मौसम

मौसम विभाग ह तीस नवंबर ले प्रदेस म पानी गिरे के संभावना जताय हे। मौसम विभाग के मुताबिक दक्षिण छत्तीसगढ़ के कुछेक जिला मन म काली उनतीस नवंबर ले बादल छाय रइही। एखरे संग न्यूनतम अउ अधिकतम तापमान म वृद्धि होय के संभावना हे। एक गहरा अवदाब दक्षिण—पश्चिम बंगाल के खाड़ी के उपर स्थित हे। एखर असर ले प्रदेस के दक्षिणी भाग म नमी के कारण हल्का बादल छाय हे।
